

Ullormik pinngortitamut qujamasuffimmik atulersitsinissaq pillugu Naalakkersuisut peqquneqarnissaannik Inatsisartunut aalajangiiffigisassatut siunnersuut.

(Inatsisartunut ilaasortaq Mimi Karlsen, Inuit Ataqtigiit)

Akissuteqaat

(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

Siullermeerneqarnera

Naalakkersuisut qujapput Inatsisartuni ilaasortap siunnersuutaanut imm. 167-imut ullorsiorfinnut tunngasumut.

Naalakkersuisut tulluusimaarutigivaat naak nutaaliaasumut ineriartoraluarluta kulturikkut kingornussagut pinngortitamut pissarititaasunullu tunngassuteqartunut suli attuumassuteqarnerput. Pilisarpugut pinngortitamilu ukiup ingerlanerani pissarititaasut aallaavigalugit atorluaasarluta. Tamannalu ullut tamaasa qujamasuffigisassavarput, ukiumut ulloq ataasiinnaanngitsaq.

Ullumikkut nunat tamalaat assigiinngitsorpassuarnut ullugititarpassuaqarpoq, Naalakkersuisut isumaqarput innuttaasut suliffeqarfiillu namminneerlutik aalajangertassagaat suut malunnartinniarnelugit aaqqissuussiffiginiarnelugillu.

Nunat tamalaat akornanni ullut nalliuttorsiorfiusut nalinginnaasumik naalakkersuisuninngaanniit atuutsinneqalersuuneq ajorput, akuerisaasarsinnaallutilli. Assersuutigalugu eqqaasinnaavara FN-imit Nunarsuarmit Nerisassanut ullugitinneqartoq, ulloq nunarsuaq kaajallallugu assigiinngitsutigut oktobarip qeqqani nalliuttorsiuutigineqartartoq. Kalaallit Nunaannit assersuutigineqarsinnaavoq nerisassarisatsinnut qujamasunnermut ukiuni kingullerni nerisassanut festivaleqartitsinikkut ilaatigut malunnartinniarneqartarpoq. Tamatumani nalinginnaasuuvoq nerisassat pinngortitatta pissarititai malunnartinniarneqartarnerat. Nunat tamalaat akornanni ullorpassuaqarpoq ullorsiorfittut nalunaarsorneqarnikunik kisiannili pisortatigoortumik akuerisaanikuunngitsunik, taamaakkaluartorli ukiut tamaasa nalliussineqartartunik, assersuutigalugu meeqqat ulluat, atuakkat ulluat allarpassuillu, tamakkualu kajumissuseq aallaavigalugu aaqqissuunneqartarput.

Peqatigiiffiit, kattuffiit, suliffeqarfiit inuinaallu suliniutinut silami ingerlanneqartussanut aaqqissuussinissaminnut qinnuteqartut allatuulli Namminersorlutik Oqartussat aningaasaateqarfiinut Tips- aamma lotto pulje B pulje C-mullu qinnuteqartoqarsinnaavoq,

Taakkua oqaaseqaatit aallaavigalugit Naalakkersuisut inassutigissavaat aalajangiiffigisassatut siunnersuut itigartinneqassasoq.